

Arnold Giger al tgamun

Il District dils catschadurs dalla Cadi ei seconstituius

■ (anr/hh) L'Uniun cantunala dils catschadurs da patentà dil Grischun ha midau statuts ed el rom da quella revisiun ha ella era dau a sesezza per part novas structuradas. Ina da quellas pertucca l'organisaziun dils catschadurs sin plaun regional. Da niev consista l'uniun cantunala era da 14 districts. Enteifer quels ein las secziuns organisadas. Ils districts fuorman aschida-dir la structura territoriala dall'uniun cantunala. Da niev ei la Surselva partida en dus districts. D'ina varta quel cul territori dalla Cadi e las sis secziuns sisum la Surselva, dall'otra vart il district che cumpeglia igl intsches dils cumins dalla Foppa, Rueun e Lumnezia sco era Versomi. Entochen uss ein ils dus districts stai organisai ell'uniun regionala dils catschadurs dalla Surselva. Quella ei vegnida dissolvida il december en vesta alla nova structura ch'entra en vigur uonn.

Eligi il tgamun

Ils districts dall'Uniun cantunala dils



Arnold Giger ei igl empren president dil district dalla Cadi dall'Uniun cantunala dils catschadurs da patentà dil Grischun.

MAD

catschadurs da patentà dil Grischun vegnan tgamunai d'ina suprastanza. Quella duei consista d'in president ed in president pils fatgs da tgira. Quella funcziun sa denton era vegnir occupada dalla medema persuna. Ils districts san denton era eleger en quella suprastanza in actuar ed in cassier. Il president dil district ei il medem mument era commember dalla suprastoza gronda dall'uniun cantunala. L'jamna vargada ei il district I che cumpeglia las secziuns Badus/Tujetsch, Greina, Pèz Alpetta, Tödi, Tumpiv e Vallatscha seconstituius. *Arnold Giger*, commember e suprastont dalla Secziun da catschadurs Greina, ei vegnius eligius sco president da quel. Arnold Giger habitescha a Landquart, mo lavura dapi ina partida onns a Glion. El va alla catscha sin intsches da Sumvitg, danunder che siu bab deriva. Sco president da tgira ei *Renato Monn* dalla Secziun da catschadurs Badus vegnius tscharnius e sco actuar *Giusep Venzin* dalla secziun Vallatscha. Il district ei sedecidiu da desister dil post

da cassier. Il medem mument ein ils statuts vegni approbai.

Danovamein referats?

El focus dalla lavur dil district stattan en emprema lingia las fatschentas ordinarias. «Denter quellas s'audan surtut era las propostas per mauns dalla radunonza dall'uniun cantunala», di Arnold Giger. Ils davos onns eis ei numnadamein semussau pli e pli ch'ina coordinaziun da quellas enteifer las regiuns ei necessaria, cass cuntrari han ellas pintgas schanzas d'haver success allas radunonzas da delegai cantunalas. Duas entochen treis radunonzas s'audan tiel pensum annual dil district. Re-activar vul Arnold Giger eventualmein era puspei ils referats tematics. Onns alla liunga ha l'uniun regionala dils catschadurs dalla Surselva purschiu regularmein tals referats a ses commembers ed alla publicitad. Quels referats eran da grond interess, tractavan els gie per ordinari temas actuals pertuccont la catscha e la natira.